

SVEČANOST DODJELE NAGRADE „EMERIK BLUM“ NAJBOLJEM MENADŽERU U FBiH/BiH

Udruženje poslodavaca Federacije Bosne i Hercegovine, kao najveće i najrepresentativnije udruženje koje okuplja vlasnike i direktore kompanija u FBiH, pokrenulo je inicijativu za dodjelu nagrade najboljem menadžeru u Federaciji BiH/BiH koja bi nosila ime Emerika Bluma, cijenjenog i priznatog menadžera, vizionara, poslovnog čovjeka koji je u Bosni i Hercegovini, ali i regionu i šire postao sinonim za poslovnost, napredak, viziju i razvoj.

Prema odlukama nadležnih tijela Udruženja poslodavaca Federacije BiH prva nagrada „Emerik Blum“ bi se dodijelila u aprilu/maju 2020. godine.

KRITERIJU ZA DODJELU NAGRADE „EMERIK BLUM“

Udruženje poslodavaca Federacije Bosne i Hercegovine formiralo je stručni žiri koji upravo radi na izradi kriterija na osnovu kojih će menadžeri biti kandidirani za dodjelu ovog visokog priznanja. Članovi stručnog žirija su ugledni predstavnici poslovne i akademske zajednice u FBiH i BiH.

Već sada je poznato da će u uži izbor za dodjelu nagrade ući desetak menadžera, a nagrada će biti dodijeljena samo jednom menadžeru koji bude ispunjavao najviše kriterije stručnog žirija.

CILJ DODJELE NAGRADE „EMERIK BLUM“

Cilj dodjele ove nagrade jeste promocija poduzetništva, menadžerskih vještina, vizionarstva, ulaganja u uposlenike, nove tehnologije, rast i napredak privrede uz poštivanje svih pozitivnih zakonskih propisa poslovanja.

Dodjelom nagrade „Emerik Blum“ ujedno javnosti želimo poslati poruku o važnosti i značaju realnog sektora i ljudi koji zauzimaju ključne pozicije u kompanijama koje stvaraju dodatnu vrijednost, pune budžetske i vanbudžetske fondove, svojim društveno odgovornim poslovanjem pomažu razvoj društva, ali i lokalnih zajednica u kojima djeluju.

KONFERENCIJA

Dodjela nagrade „Emerik Blum“ zamišljena je kao cjelodnevni događaj. Tokom dana planirana je konferencija u okviru koje bi predstavnici poslovne zajednice, akademske zajednice, donositelji odluka na različitim nivoima (izvršna i zakonodavna vlast) zajednički razmatrati aktuelne teme iz oblasti poslovanja te na taj način pokušati naći zajednička rješenja koja će pomoći razvoju poduzetništva i privrede u našoj zemlji.

SVEČANOST DODJELE NAGRADE „EMERIK BLUM“

Svečanost dodjele nagrade „Emerik Blum“ bila bi organizirana u ranim večernjim satima uz direktan televizijski prijenos na nekoj od gledanih televizijskih stanica u Bosni i Hercegovini.

Svečana ceremonija dodjele nagrade „Emerik Blum“ bila bi cjelovečernji događaj koji bi u osnovi imao za cilj promociju poduzetništva, razvoja i napretka.

PROMOTIVNE AKTIVNOSTI

Dodjela nagrade „Emerik Blum“, kao i prateća konferencija ovog događaja, bili bi praćeni odgovarajućom promotivnom kampanjom u medijima (TV, radio, print i web portali), kao i na društvenim mrežama.

Promotivna kampanja je idealna prilika za promociju sponzora dodjele nagrade, jer bi na taj način u javnosti bili predstavljeni kao vrlo konkretna podrška razvoju poduzetništva, poslovanja i napretku društva i države u cjelini.

PLANOVI ZA BUDUĆNOST

Nagrada „Emerik Blum“ u prvoj godini bi se dodjeljivala samo za privrednike iz Federacije BiH. U osnovi, smatramo da ova nagrada, kao prestižno priznanje, treba i mora biti dodijeljena najuspješnijem menadžeru iz Bosne i Hercegovine.

U narednim godinama bi se intenzivno radilo na regionalnom karakteru nagrade, tako da bi nagrada „Emerik Blum“ bila dodjeljivana i za menadžera godine u BiH ali i menadžera godine u regionu.